

總釋陀羅尼義讚

三藏沙門大廣智不空奉 詔解釋

如來於百千俱胝阿僧祇劫，積集菩提資糧，加持陀羅尼真言文字，令頓悟菩薩與此相應，頓集福德智慧資糧。於大乘修菩薩道二種修行，證無上菩提道，所謂：依諸波羅蜜修行成佛，依真言陀羅尼三密門修行成佛。

陀羅尼者，梵語，唐翻名為總持義。

有四種持：法持、義持、三摩地持、文持。此四種持，多依顯教大乘教中所說也。

法持者，由得此持，摧滅一切雜染之法，證得清淨法界等流教法。

義持者，由得此持，於一字義中，悟百千無量修多羅行，演說逆順自在。

三摩地持者，由此持故，必不散動，三昧現前，悟無量百千三摩地門。悲增菩薩，故於六趣，以願受生，不被煩惱、隨煩惱壞其三昧。由此三摩地，證五神通，成就利樂無邊有情。

文持者，由此受持陀羅尼，成就所聞。所謂一切契經，於一切如來諸菩薩所，聞百千無量修多羅，永不忘失。

其真言亦具四義。真者，真如相應。言者，真詮義。四義者：

法真言，清淨法界，以為真言。

義真言者，勝義相應，一一字中，有實相義。

三摩地真言者，由瑜伽者用此真言，於心鏡智月輪上，布列真言文字，專注心不散動，速疾證三摩地，故名三摩地真言。

文持真言者，從唵字至娑嚩賀，於其中間，所有文字，一一字皆名為真言。

亦云密言，亦具有四義：

法密言者，非法外道及二乘境界，唯修真言行菩薩。所聞所持軌則、印契、曼荼羅，修行所求悉地，名法密言。

義密言者，真言中一一字，唯佛與佛、大威德菩薩，乃能究盡。

三摩地密言者，由此中真言文字三摩地相應威力，遍布真言者身支分，變鹿重身，易得微妙色身，獲得五神通，威德自在，壽量無盡。

聞持密言者，從師密受三密軌則，唯師及弟子自知，非令餘人之所知也。乃至本尊形像、印契觀門，皆密受持。獲得心所希望三摩地，聞持不忘，天眼、天耳、他心上中下悉地。

亦名為明，具四義：

法明者，修行者稱誦一字中光明，遍照十方世界。一切有情，沈溺生死苦海，皆破無明煩惱，悉得離苦解脫，故名法明。

義明者，由瑜伽者與真言義相應故，通達明了般若波羅蜜，遠離無義道理。

三摩地明者，由真言種子想於心月輪中，獲得大光明，作自他照明，三摩地成就。

聞持明者，證得聞持法，能破廢忘之惑，證得菩提心成就。

如上陀羅尼、真言、密言、明義依梵文，復於顯教修多羅中稱說，或於真言密教中說如是四稱。或有一字真言，乃至二字、三字，乃至百字、千字、萬字，復過此數，乃至無量無邊，皆名陀羅尼、真言、密言、明。若與三密門相應，不暇多劫難行苦行，能轉定業，速疾易成安樂成佛速疾之道。